

समा. 09.20 Hrs

Headlines

- 18मां ब्रिक्स शिखर सम्मेलन अज्ज नमीं दिल्ली दे भारत मंडपम च शुरु होआ रदा ऐ, मिम्बर मुल्लें आसेआ वैश्विक शासन, बपार-कारोबार ते निवेश जनेह प्रमुख विशें पर गल्लबात करने दी मेद ऐ।
- मुख सचिव अटल डुल्लु होरें प्रदेश स्तर दे परियोजना निगरान समूह गी कायम करने दी समीक्षा कीती। राश्ट्रीय परियोजना निगरान ग्रुप दे नुमायंदें एहदे लेई पेशकश कीती।
- सेना दी उत्तरी कमान दे कमांडर लैफ्टिनेंट जनरल प्रतीक शर्मा होरें गलाया जे उत्तरी कमान जम्मू-कश्मीर च सुरक्षा यकीनी बनाई रखने दे कन्नो-कन्नौ, नौजवानें दे भविष्य गी सोआरने च बी मदद करा'रदी ऐ।
- जल शक्ति मंत्री जावेद अहमद राणा होरें पुच्छ जिले दे सुरनकोट च विकास सरबन्धी ते हाड़े मगरा पुर्नव्हाली आले कम्में दा जायजा लैता।
- ते जम्मू-कश्मीर दे पैहले अंतराश्ट्रीय फिल्म महोत्सव दे बाहरे दस्तकारें दी प्रदर्शनी गी सैलानियें ते लोकें बड़ा पसंद कीता ऐ।

BRICS Summit

18मां ब्रिक्स शिखर सम्मेलन अजै सोआ नमीं दिल्ली दे भारत मंडपम च शुरु होआ रदा ऐ। दंऊ दिनें दे इस बड्डे कार्यक्रम च ब्राजील, चीन, मिस्र, इथोपिया, इंडोनेशिया, भारत, ईरान, रुस, सऊदी अरब, दक्खन अफ्रीका ते संयुक्त अरब अमीरात सनें 11 प्रमुख विकासशील मुख्य किट्टे इक्कै मंच पर आवाँ'रदे न। इस शिखर सम्मेलन दौरान वैश्विक शासन, आलमी स्तह पर किट्टे रलियै कम्म करना, बपार ते निवेश, प्रोद्योगिकी, खाद्य ते ऊर्जा सुरक्षा, सेहत, आपदा सरबन्धी तैयारियें ते जरूरी सप्लाई चेन जनेह महत्वपूर्ण विशें पर गल्लबात कीते जाने दी मेद ऐ। भारत इस बारे ब्रिक्स शिखर सम्मेलन दी अगुआई करा'रदा ऐ।

लचीलापन, नवाचार, सहयोग ते स्थिरता लेई निर्माण, दुनिया भरै थमां केई नेता इस सम्मेलन च हिस्सा लै'करदे न, जिंदे च प्रधानमंत्री नरेन्द्र मोदी हुंदे सनें रुस दे राष्ट्रपति व्लादीमीर पुतिन, चीन दे राष्ट्रपति Xi Jinping, दक्खन अफ्रीका दे राष्ट्रपति Cyril Ramaphosa, मिस्र दे राष्ट्रपति Abdel Fattah El-Sisi, इंडोनेशिया दे राष्ट्रपति Prabowo Subianto ते ईरान दे राष्ट्रपति Masoud Pezeshkian होर शामिल ना। प्रधानमंत्री नरेन्द्र मोदी हुंदा शिखर सम्मेलन दे बाहरे ब्रिक्स नेताएं कन्नै दपक्खियां गल्लबात करने दा बी कार्यक्रम ऐ, जिंदे च चीन दे राष्ट्रपति Xi Jinping, अबुधाबी दे युवराज Sheikh Khaled bin Mohammed bin Zayed Al Nahyan, इथोपिया दे प्रधानमंत्री Abiy Ahmed Ali, मलेशिया दे प्रधानमंत्री अनवर इब्राहिम ते Vietnamese दे प्रधानमंत्री Le Minh Hung हुंदे कन्नै गल्लबात शामिल ऐ।

<><><><><><>

CS-PMG

जम्मू-कश्मीर राष्ट्रीय परियोजना निगरान समूह आला लेखै गै अपना इक परियोजना निगरान समूह JK-PMG कायम करने दी योजना बना करदा ऐ, तां जे बड़ी विकास परियोजनाएं पर नेइमी तक्क रक्खी जाई सकै ते उन्दी अमलावरी दौरान औने आले कुसै बी मसले गी हल करने च मदद थ्होई सकै। राष्ट्रीय परियोजना निगरान समूह दे नुमायंदें, इस बवस्था आंगर लेखा गै प्रदेश च बी इस सरिस्ते गी कायम करने लेई इक पेशकश मुक्ख सचिव अटल डुल्लु हुंदे अगो रक्खी।

इस प्रस्तावित प्रणाली दा मकसद परियोजनाएं दी निगरानी गी होर मजबूत बनाने, बक्ख-बक्ख मैहकमे बश्कार तालमेल च सुधार करने ते जिमीं हासल करने, मंजूरी ते परियोजनां सरबन्धी होरनें मामलें पर समें-सिर कारवाई यकीनी बनाना ऐ। अटल डुल्लु होरें आखेआ जे असें'गी लोइचदा जे तकनीकें दा इस्तेमाल करियै समें-समें पर अपडेट देने दे बजाए, Real Time आधारत परियोजना निगरानी पर ध्यान केन्द्रित करचै।

<><><><><><>

Army Commander-Security JK

सेना दी उत्तरी कमान प्रमुख लैफ्टिनेंट जनरल प्रतीक शर्मा होरें आखेआ जे उत्तरी कमान, जम्मू-कश्मीर गी सुरक्षित रखने दे कन्नो-कन्नी विकास दे मौके पैदा करियै घाटी दे नौजवानें दे भविष्य गी सोआरने च बी मदद करा'रदी ऐ। अनंतनाग जिले दे पैहलगाम च आर्मी Goodwill स्कूल च बोलदे होई लैफ्टिनेंट जनरल शर्मा होरें सुरक्षा यकीनी बनाई रखने ते समुदाय गी समर्थन देने च सेना दी दोहरी भूमिका पर लौ पाई। उ'नें गलाया जे जिआं-जिआं मुख्य विकसित भारत दी बक्खी अगड़ा बदा'रदा ऐ, उत्तरी कमान, जम्मू-कश्मीर दे लोकें प्रति अपने समर्पण ते खित्ते च रमानदारी यकीनी बनाई रखने दे कन्नो-कन्नी राष्ट्र निर्माण लेई वचनबद्ध रौहगा।

<><><><><><>

GOC WKC-Kishtwar Visit

फौज दी व्हाई नाइट कोर दे GOC लैफ्टिनेंट जनरल पी.के. मिश्रा होरें किशतवाड़ जिले दे बक्ख-बक्ख इलाकें दा दौरा लाया ते सुरक्षा हालात, आतंकवाद रोधी बवस्था ते फौज दी कारवाइयें सरबन्धी जानकारी हासल कीती। “एक्स” दी इक पोस्ट पर व्हाई नाइट कोर नै जानकारी सांझी कीती जे कोर कमांडर होरें सुरक्षा बवस्था, आपदा सरबन्धी तैयारियें ते बुनियादी ढांचे वगैरा दा जायजा लैता। उ'नें सैनिकें गी आखेआ जे ओह खित्ते च कारवाइयें दी कुशलता, सुरक्षा ते समर्थन गी होर बधाने लेई बाद्दू गेंह पुट्ठन। पी.के मिश्रा होरें सब्भनें गी हर समें चौकस रौहने ते कारवाइयें लेई तैयार रौहने लेई आखेआ।

<><><><><><>

DGP -Border Protection Grid

जम्मू-कश्मीर दे DGP नलिन प्रभात होरें BSF, CRPF ते जम्मू-कश्मीर पुलिस दे वरिष्ठ अफसरें ते टीमें कन्नै सीमा सुरक्षा तंत्र दा जायजा लैता। बैठक दौरान उ'नें मौजूदा सुरक्षा बवस्था ते बन्ने दी असरदार तरीकें कन्नै राक्खी-हिफाजत लेई सुरक्षाबल किन्नी खरी चाली तैयार न, इस बारे बी गौर कीता।

इस दौरान एजेंसिएं बशकार तालमेल बधाने, कारवाइयें सरबन्धी तैयारियें गी होर निग्गर बनाने ते इस गल्लै गी यकीनी बनाने पर ध्यान दिता गेआ जे संवेदनशील इलाकें च तगड़ी सुरक्षा बनी सकै। DGP होरें कुसै बी नमीं सुरक्षा चुनौती कन्ने निब्बड़ने ते इलाके गी सुरक्षित रखने लई सब्भनें सुरक्षाबलें बशकार नेड़मा तालमेल बनाइयै कम्म करने दी जरुरतै पर जोर दिता।



Rana –Devp Works

जल शक्ति मंत्री जावेद राणा होरें पुंछ दे सूरनकोट इलाके च हाड़ें मगरा कराए गेदे राहत ते पुर्नवास कम्में ते विकास कम्में दा जायजा लैने आस्तै इक मीटिंग दी अध्यक्षता कीती। मंत्री होरें जल शक्ति विभाग गी निर्देश दिता जे सूरनकोट कस्बे च पानी सप्लाई प्रणाली च सुधार आस्तै इक तफसीली DPR पेश करन। उ'नें इब्बी निर्देश दिते जे Lift सिंचाई स्कीमें बारे तफसीली सुझाव प्रस्तुत कीते जान, खास करिऐ हाल च आए दे हाड़ें च नुक्सान पुज्जी दी सिंचाई कूहलें दे बारे च, जेदे करी धान लगाने आले ते दुए राई-बाई आले इलाकें च समस्या बनी दी ऐ। उ'नें अधिकारियें गी आखेआ जे लोकें दी समस्याएं गी हल करने पर ध्यान दिता जा ते उन्दी समस्याएं गी सुनने, समझने लेई उपलब्ध रौहन।



Artisans-IFFJK Show

दस्तकारी ते हत्थकरघा विभाग नै इस म्हीने श्रीनगर च जम्मू-कश्मीर दे पैहले अंतराष्ट्रीय फिल्म उत्सव दे बाहरे “Know Your Artisan” अभियान तैहत कश्मीर दी GI-Tagged आली शानदार दस्तकारिएं गी कामयाबी कन्ने प्रदर्शित कीता। विभाग ने कला, दस्तकारी ते परम्परा दे इक शानदरा मिश्रण गी उजागर कीता, जिस्सी पर्यटकें, कला प्रेमिऐं, विद्यार्थियें ते आम लोकें बड़ा पसंद कीता। विभाग दे प्रवक्ता नै कल प्रैस लेई जारी ब्यानै च दस्सेआ जे घट्ट शा घट्ट 26 स्टॉल लाए गेदे हे, जिंदे च अदभुत दस्तकारी रचनाएं गी पेश कीता गेआ। प्रदर्शनी दिक्खन आए दे लोकें, माहिर दस्तकारें कन्ने सिद्धें गल्लबात कीती ते उन्दे उत्पादें बारे जानकारी लैती।



Crochet Bussiness-Udahmpur

उधमपुर दी इक महिला नै पारम्परिक क्रोशिया बुनाई कला गी इक शानदार घरेलू कारोबार च बदली दिता ऐ। 28 बरें दी पोस्ट ग्रैजुएट पल्लवी सेठ ने अपने मनपंसद रिवायती क्रोशिया बुनाई ते उन्न दी दस्तकारी आले हुनर गी इक कामयाब घरेलू कारोबार च तब्दील कीता। ओदे हत्थें दे बनाए गेदे कलीरें, जयमाला, गुलदस्ते, Key Chains, घरेलू सजावट दा समेयान ते दूइयां रचनात्मक दस्तकारियां हून जम्मू, कटरा उधमपुर ते होरनें इलाकें च गाहक खरीदा करदे न। ओदा इब्बी आखना ऐ जे होरनें ग्रामीण महिलाएं गी उन्दे कौशल गी टिकाऊ आजीविका च तब्दील करने लेई प्रेरणा देने दा ओदा लक्ष्य ऐ। अपने उद्यम बारे मती जानकारी दिंदे होई पल्लवी होरें आखेआ.....

<><><><><><>

Resham-Ramban

रामबन जिले च “मेरा रेशम, मेरा अभियान” आली पैहलकदमी तैहत जारी राश्ट्रव्यापी, रेशम उद्योग बारे जागरुकता ते तकनीकें गी सांझा करने आले अभियान दे अंतर्गत केंई करसान सिखलाई कार्यक्रम कामयाबी कन्नै कराए गे न। रामबन दे रेशम विभाग आसेआ कराए गेदे सिखलाई कार्यक्रम राएं करसानें गी रेशन दी माहिराना जानकारी दिती गेई, तां जे रेशम दा उत्पादन बढ़े ते रोजगार दे मौके पैदा होन। रामबन दे जिला सेरीकल्चर अफसर कुलबीर सिंह बाली होरें इस बारे दस्सेआ.....

<><><><><><>